





Luar Negara



CACAR
monyet
setakat
ini sudah
menjangkiti
hampir 17,000
orang di 74
negara.

WHO isytihar wabak itu sebagai
darurat kecemasan global

Cacar monyet bakal atasi Covid-19?



GENEVA: Pertubuhan Kesihatan Sedunia (WHO) kelmarin mengisytiharkan wabak cacar monyet yang setakat ini sudah menjangkiti hampir 17,000 orang di 74 negara sebagai darurat kesihatan global.

Ketua WHO, Tedros Adhanom Ghebreyesus dalam sidang akhbar memaklumkan, keputusan itu dibuat berdasarkan perkembangan penularan wabak itu secara global dan kebimbangan pelbagai pihak mengenainya.

Katanya, pasukan pakar yang mengadakan pertemuan pada Khamis lalu gagal mencapai kata putus mengenai wabak tersebut, sehubungan itu, beliau memutuskan untuk mengisytiharkan cacar monyet sebagai darurat kesihatan global.

“Penilaian WHO mendapati risiko cacar monyet adalah sederhana secara global di kebanyakan negara, kecuali di Eropah,” katanya.

Cacar monyet setakat ini menjangkiti lebih 16,800 orang di 74 negara, menurut statistik yang dikeluarkan oleh Pusat Kawalan dan Pencegahan Penyakit (CDC) Amerika Syarikat pada 22 Julai lalu.

Dalam pada itu, Washington menyambut baik keputusan yang dibuat oleh WHO dan mengesakan seluruh dunia bekerjasama untuk mengekang penu-



ORANG ramai beratur untuk menerima vaksin cacar monyet di Brooklyn, New York, Amerika Syarikat pada 17 Julai lalu. - AFP

laran wabak berkenaan.

“Kerjasama dan kefahaman global dapat membantu menghentikan penularan cacar monyet, sekali gus melindungi komuniti daripada dijangkiti wabak itu,” kata Raj Panjabi, Pengarah Kanan Jabatan Pertahanan Bio dan Keselamatan Kesihatan Global di White House.

Peningkatan penularan cacar monyet di luar negara Barat mula direkodkan pada awal Mei lalu, manakala penyakit itu sudah lama bertapak di Amerika Tengah.

Secara keseluruhannya, se-

banyak 98 peratus individu yang dijangkiti merupakan lelaki gay yang melakukan hubungan seks sejenis.

Sehubungan itu, Ghebreyesus menegaskan, stigma masyarakat terhadap golongan tersebut dikhuatiri boleh menjadikan penularan wabak itu semakin sukar untuk dikesan.

Hal ini kerana, golongan tersebut akan berasa seperti ‘dimalukan dan dipandang serong’ oleh masyarakat.

Jelas Ghebreyesus, perkara itu boleh ditangani dengan pen-

dekatan yang sewajarnya.

Tegasnya, semua negara perlu ‘berkomunikasi dan bekerjasama’ dengan golongan berkenaan supaya maklumat mengenai cacar monyet dapat disalurkan dengan tepat, sekali gus meningkatkan pemahaman bagaimana penyakit itu tersebar.

VAKSIN

Pada 23 Jun, WHO mewujudkan jawatankuasa pakar untuk memutuskan sama ada cacar monyet boleh diisytiharkan sebagai Kebimbangan Antara-

bangsa Mengenai Darurat Kesihatan Awam, iaitu tahap amaran tertinggi yang dikeluarkan oleh agensi tersebut.

Namun, majoriti menasihatkan Ghebreyesus bahawa situasi itu masih belum sampai ke ‘peringkat ancaman’.

Kemudian, pertemuan kedua diatur pada Khamis lalu berikutan peningkatan jumlah kes dan disebabkan jawatankuasa berkenaan masih belum memutuskan apa yang perlu dilakukan, maka Ghebreyesus mengisytiharkan cacar monyet sebagai darurat kecemasan global.

Berdasarkan kajian yang dilakukan terhadap 528 orang di 16 negara, 95 kes jangkitan adalah menerusi aktiviti seksual.

Keadaan itu menyebabkan Agensi Ubatan Kesatuan Eropah mencadangkan kelulusan penggunaan vaksin Imvanex untuk merawat cacar monyet.

Imvanex yang dikeluarkan syarikat ubatan Denmark, Bavarian Nordic diluluskan penggunaannya di EU sejak 2013 bagi mencegah penularan demam campak.

Antara gejala dijangkiti cacar monyet termasuk demam, sakit kepala, sakit otot dan sakit belahkang dalam tempoh lima hari.

Cacar kebiasaannya keluar pada muka, tapak tangan dan kaki, diikuti dengan melepuh, luka dan kudis. - AFP